

Die Schwieschermudder unn de Babbegi

Gessdern Owend nooch de Tagesschau hotts onn de Hausdier geklingeld, isch mach uff unn doo stieht moin Nochber Herbert onn de Dier.

No Herbert, saach isch, su spät? Was hosde donn?

Doo seeder: Du Honnes, du musst merr helfe. Moi Schwieschermudder leiht dood in de Wohnstubb erum unn isch soll die fortschaffe. Awwer die iss merr ze schwer unn doo wollt isch disch frooche, ob de merr debei helfe kennst.

Was seesde?, habb isch gefroochd, doi Schwieschermudder iss dood? Doo mussde de Notarzt oorufe, die kumme donn, dun de Doodeschoi ausstelle unn donn konnsde enn Bestatter oorufe, der hollt se donn ab. Mir schlebbe die Fraa nitt doorum.

Honnes, hott de Herbert gesaad, isch muss die fortschaffe. Weil isch habb mett dere doorum geschdridde, doodebei isse geesche die Bierflasch gelaafe, die isch in de Hond hadd – ja, unn seitdem lieht die dood doo rum.

Herbert, saach isch, wenn dess su iss, donn kann isch derr erst recht nitt helfe. Du musst bei die Bollizei gieh unn musst dess melde.

Ei Honnes. De Herbert hott bald geflennd. Isch war doch uff de Bollizei unn der Beomde dort hott merr gesaad, was ich mache soll, wonn isch ebbes mett dem Dood vunn de Schwieschermudder ze due hädd.

Unn was sollsde mache?, frooch isch.

Doo kreischder: Ei genau dess, die Schwieschermudder fortschaffe.

Dess kann isch merr nitt vorstelle, saach isch, awwer jetz verzähl merr mol, wie dess uff de Bollizei gewese iss.

No ja, dess mett de Schwieschermudder iss bassierd su geesche finf. Unn als isch gemerkt habb, dass se dood iss, bin isch gleich bei die Bollizei. Su enn Beomde, villeischd verrzisch Johr alt, hott misch gefroochd: Was kann ich für Sie tun?

Isch saach: Moi Schwieschermudder iss dood, sie misse misch verhafde.

Verhaften, wieso?

Weil isch se umgebroschd habb.

Was ist geschehen?

Moi Fraa iss ze Zeit in Kur in Bad Füssing, unn doo iss vor ooner Stunn ihr Mudder bei misch kumme unn hott mett merr geschennd. Isch deet hier dehoom erum sitze, deet Bier drinke unn die Fraa deet Juchhee mache, jeden Owend deet se donse gieh unn daachsiwwer deed se im Kurpark mett su emm Kerl Händsche halle. Unn was isch fern Kerl wär, isch sollt bei se fahrn unn se nitt alloo losse – allsfort hottse gebreweld unn geknodderd unn dess iss merr uff oomol ze vill worrn, doo habb isch die Bierflasch hochgehalle, sie iss mett ihm Kobb degeesche gerennd unn jetz dut se uff unserm Debbisch erumleihe unn iss dood.

Woher wissen Sie, dass sie tot ist?

Isch habb in de Voochelkeefisch gegriffe, habb unserm Babbegei e Bauchfedder ausgerobbd unn habb die Fedder de Schwieschermudder vors Maul, also vor ihrn Mund gehalle. Die Fedder hott sisch nitt beweeschd unn also isse dood. Dun se misch jetzt verhafte?

Jetzt hott der Bollizisd soi Kabb uffgesetzt, weil jetzt warer rischdisch omtlich.

Mein Herr, hodder gesaad, so geht das nicht. Wo kommen wir denn hin, wenn jeder, der seine Schwiegermutter umbringt, hierkommt und sagt, verhaften Sie mich? Unn dann kommt einer von den Kolonnaden und sagt, ich hab ein Auto angefahren und bin weggefahren, schreiben Sie mich auf wegen Fahrerflucht. Oder wenn ein Dieb hierherkommt, eine Goldkette auf den Tisch legt und sagt, die habe ich gestohlen, bringen Sie mich ins Gefängnis?

Was hätten wir dann noch zu tun? Wir sind hier sechs Leute und wenn nichts mehr zu tun ist, werden zwei davon überflüssig und werden versetzt, vielleicht nach Marburg oder Kassel, dann müsste er jedes Wochenende hin und her fahren oder umziehen und teure Miete bezahlen, das wollen Sie doch nicht, oder?

Nein, wir Polizisten wollen unsere Arbeit machen und deshalb fahren Sie jetzt nach Hause, legen die Tote in Ihr Auto und bringen sie an den Main, werfen sie ins Wasser und morgen geben Sie eine Vermisstenmeldung auf. Dann beginnt unsere Arbeit und glauben Sie mir, dann dauert es nicht lange und wir bringen den Mörder ins

Gefängnis. Also hauen Sie ab und lassen Sie uns von morgen an unsere Arbeit machen.

Su hodder dess gesaad, Honnes, unn dessde-weesche bin isch jetz bei derr unn isch denk, mir zwaa dun die Alt in doi Audo lade weil des gree-ßer iss als wie moins unn donn fahrn merr e-nunner onn de Moo unn schmeiße se ins Wasser.

Isch habb de Kobb geschiddeld. Herbert, dess alles hosde doch gedroomd, odder? Wenn die Fraa e paar Daach fort iss, dess waaß isch vunn mir, kimmt merr uff die dollsde Gedonke.

Honnes, doo iss awwer noch ebbes gewese. Grad wollt isch bei de Bollizei die Dier enaus hott der Beomde gerufe: Halt! Kommen Sie noch einmal her. Sie haben also mit einer Feder von Ihrem Papagei geprüft, ob die arme Frau tot ist. Wie war das mit dem Papagei?

Isch habb in de Keefisch gegriffe, habb dem Babbegi e Bauchfeder ausgerobbd unn habbse de ...

Noch einmal Halt: Eine Bauchfeder ausgerissen? Das hat dem Papagei doch sicher weh getan, oder?

Ei ja, er hott aach mett merr geschennd unn gekrische: Dess dut doch wieh, du Simbel.

Wer hat „geschennd“? Wer hat „gekrische“?

Ei de Babbegi.

Da hatte er auch recht. Denn Sie haben ohne Not dem Tier Schmerzen zugefügt, das ist laut Tierschutzgesetz verboten. Daher verhängen ich eine Ordnungsstrafe von 20 Euro, sofort zu zahlen.

Zwonnsisch Euro, weesche ooner Fedder?

Zwanzig Euro wegen der Schmerzen, die Sie dem Vogel zugefügt haben.

Hier bittschee 20 Euro. Awwer isch hädd gern e Quittung.

Können Sie haben. Hier bitte. Nun gehen Sie und machen Sie wie von mir vorgeschlagen: Entsorgen Sie die Leiche und rufen Sie morgen an und geben eine Vermisstenmeldung auf. Hier unsere Telefonnummer.

Honnes, genau su isses gewese unn jetzt holl doi Audo unn donn schaffe merr die Alt fort.

Gut Herbert, mache merr. Also los! Fraa, isch fahr grad de Herbert emol fort, isch bin gleich widder doo.

Uffem Weesch zum Audo seet de Herbert: Ach noch ebbes, Honnes: Wie isch fortgonge bin habb isch noch geheerd wie de Bollizist vor sisich hie gebabbeld hott: Einem Vogel bei lebendigem Leib eine Feder ausreißen, bei lebendigem Leib! Das muss man sich einmal vorstellen. Nein, nein, was gibt es doch für gefühllose Menschen!